

冷

廬

雜

識

冷廬雜識卷五目錄

醫學源流論

嘉靖冤獄

賜書加點

常食之物

方文輶

何文安公輓聯

洪地齋

藥陽子役圖

大成殿藏書主記

鯽魚

史文靖公

科名盛事

討賊誓詞

凡將篇

師古

文鮮襲用

鄭崧陽

爲學之道

王文成公用兵

从吉

至公堂

父子同試鴻博

五絕佳作

凌黃沅

孔梧鄉

鯤濱姪

文弟子

自然氣化

楊姓

明閣臣狀元

複句

發語辭

古列女傳

潘太守詩

唐伯虎

吳宇入詩

賦韻

孫春沂

孔大令

左忠毅公

裴晉公

蔡明經

瑪華妹

義田

謝侍郎

張太史聯

稱人爲官

建文帝

二鳥詩

何文肅公

七李杜

蘇紹

尊經閣祀典

神釘

外吏起家人閣

王惺齋大令

案

維莫之春

疏表傑作

九言詩

吳柳塘詩

初三月

塵角解

顧亭林獄事

汪文端公

對聯複字

眞賞難逢

俚語本佛書

韓詩外傳

論衡

瓊

杯中角影

明史體例

語意相似

郭子儀

文章流別論

豫章行樂府

清和

飛英塔

華陀廟聯

徐冲晦

瘡方

元真子祠聯

蒙求

文選

安儀周

齊名

明政

朝邑志

成仁取義

李太白瀨水貞義女碑

知縣承襲

鄺湛若

荆軻

天祿識餘

歇後語

前漢丞相謚

疊字

忍字

楊守謙客

五聖丹

方公祠

吳祭酒尺牘

會試總裁五人

學政三年六人

題句鐫竹

三世能詩

用民興利

漢書造語絕異

千里駒

有明一代至文

黃鶴樓聯

西村集

傳神寫照

張少宗伯

博古通今

三圈手

臨文不諱

續名醫類案

冷廬雜識卷五

桐鄉 陸以活 敬安

醫學源流論

徐靈胎醫學源流論云有病固當服藥乃不能知醫之高下藥之當否不敢以身嘗試莫若擇至易輕淺有益無損之方以備酌用如偶感風寒則用葱白蘇葉湯取微汗偶傷飲食則用山楂麥芽湯消食偶感暑氣則用六一散廣藿湯清暑偶傷風熱則用燈心竹葉湯清火偶患腹瀉則用陳茶佛手湯和腸胃如此之類不一而

足卽使少誤必無大害又有藥似平常而竟有大誤者如腹痛嘔逆之症寒亦有之熱亦有之暑氣觸穢亦有之或見此症而飲生薑湯如果屬寒不散寒而用生薑熱性之藥與寒氣相關已非正治然猶有得效之理其餘三症飲之必危曾見有人中暑而服濃薑湯一碗覆杯卽死若服紫蘇湯寒卽立散暑熱亦無害蓋紫蘇性發散不拘何症皆能散也按此論懲藥誤而發微病用之最爲穩善養生家不可不知

明嘉靖時冤獄莫甚於李福達而陳洸次之皆因議禮而成以是知名不正必至於刑罰不中也又張福獄亦由私忿而致奇冤李福達事見馬錄傳陳洸事見葉應龍傳張福事見熊浹傳比類觀之可以知其失矣

賜書加點

侯景將鎮河南請於高歡曰今握兵在遠姦人易生詐僞大王若賜以書請異於他者許之每與景書別加微點雖子弟弗之知及歡疾篤世子澄矯書召之景知僞懼禍乃降梁隋文帝愛其子漢王諒與之約若璽書召

驗親敕字加點又與玉麟符合則就道蓋卽襲景之智
景大慙不足道隋文廢長立愛乃亦假小智以濟私恩
宜其速底敗亡致諒亦不得其死也

常食之物

醫家謂粟百益一損梨百損一益韭與茶亦然余謂人
所常食之物凡和平之品如麥苽蓮子龍眼等皆百益
一損也凡峻削之品如檳榔豆蔻仁煙草酒等皆百損
一益也有益無損者惟五穀至於鴉片煙之有損無益
人皆知之而嗜之者日衆亦可憫矣

方文輅

乾隆時淳安方文輅大令黎如圭講杭州紫陽書院
中名士如陳勾山太僕兆崙杭堇浦太史金長孺大令
虞皆不服乃拈驅蛇龍而放之消題爲課諸人所作才
氣雄肆祇就驅字放字著筆方作獨詮發消字衆始悅
服

何文安公輓聯

道州何文安公師漢幼失怙恃家貧刻志勵學通籍
後登掌文衡道光辛卯典浙試後卽督浙學待士外嚴

而內和校閱公明士論翕服庚子薨於位海內之贈祭
文輓聯者嗣君編錄成集刊之今摘其尤於左英相國
和云再世獲傳衣最喜緣深堪歷久三台期接席那知
望切竟成空副憲毛伯雨師式郇云累世簪毫方期啟
沃酬恩尙克同心作霖雨數旬駢牡豈意春明話別不
堪回首望停雲曾京卿望顏云朝露洒遺牋問幾人東
閣重窺有子才如蘇右相春明陪末座憶兩載南車親
奉前賢悵失鄭司農錢給諫儀吉云淵雲大文趙張爲
政舊建家風時望兼漢建數子省臺故事都邑謳思門

牆述訓令名傳荆國先賢鄂太史恒云一品荷殊榮文
望官聲端謹咸欽臣節粹千秋逢異數崇銜美諡幽冥
應感聖恩深汪明府仲洋云踐道一身脩賢平言功者
德易名當代少止於理義日安

洪地齋

臨海洪地齋孝廉坤煊負異才朱文正公視學至台地
齋方居內艱物色得之命以墨經與古學之試遂於乾
隆己酉歲拔入成均與蕭山王琬馨紹爾東陽樓更一
上層齋名稱爲浙東三傑王子應試北闈報捷後偶感

時疾自疑虛羸誤服參耆而卒距揭曉甫十日宋獨山
明府世榮愼以詩云泥金報捷正喧闐誰遣巫陽下九
天泉路又添才鬼席家門剛啟賀賓筵元城空說留經
笥伯道何時卜墓田太息都門分手日八街槐影語纏
綿藉甚文名落拓身每於疎散見天真憐才竟負朱公
叔古貌空傳杜子春地齋目微眇萬卷書憑棺束骨千金方
誤藥沾唇地齋知醫自飲其方而卒都門舊雨知無幾誰送靈輶下
潞濱

潞陽于役圖

先伯父少石公官京師時與諸名流爲詩酒之會江都
羅兩峰布衣聘亦與焉乾隆壬子三月公奉

命往熱河校 文津閣四庫書羅爲作灤陽千役圖并
題詩云欲雨不雨吟春陰欣然結社成詩林觴詠同君
展修禊恐此會後還追尋春華正放長安陌駕言灤陽
事行役愈云小別各罄懽莫負當筵酒脂碧圖作青綠
山水著色不多神韻獨絕

大成殿藏舊主記

杭州府學文廟重修於嘉慶壬戌年時司事者爲邵上

舍志鋟以廟主已倣乃更易新者藏舊主於大成殿
座後而爲之記錢塘陳曼生司馬鴻壽書之刊於大成
門外東廊其辭曰攷古廟主藏用石室有事則陳旣納
北壁爲辟火災兼示靜謐後世敬禮備謂尊不可撤以
座甯主丹漆是飾維大成殿座遵後世式厥制崇高工
用鏤刻歲久勿治華采或蝕茲廟貌旣新敬鳩衆力儲
材重作舊觀勿失又今兩廡主改遷嘉栗尊新藏舊藏
處宜密謹於座後仿古夾室盡安舊主俾永無佚藏同
祧主惟祭不必出爰識始末使後重修者悉時元默聞

茂壯月吉日承修學宮人邵志錕謹述

鱖魚

爾雅鱖當鮓郭璞注今江東呼最大長三尺者爲當鮓
邵氏正義謂卽鱖魚杭州鱖初出時豪貴爭以餽遺價
甚貴寒窶不得食也凡窶筵魚例處後獨鱖先登胡書
農學士詩云銀光華宴催登早鮓味寒家餽到遲體物
殊切

史文靖公

溧陽史文靖公貽直祖鶴齡父夢子奕簪四代皆以翰

林起家公於康熙庚辰聯捷成進士年甫十九在外督撫七省在內六官之司罔不爰歷居相位垂二十年名注朝籍六十四年乾隆庚辰重赴瓊林宴癸未薨於位年八十二名位福壽罕有其比

科名盛事

本朝祖孫會狀惟長洲彭侍講定求及其孫尙書啟豐尙書之壻陽湖莊學士培因亦大魁天下可稱科名盛事

討賊誓詞

明臨海陳木叔函輝嘗作告太祖討閩賊誓詞云敵王
所憚請其揮魯陽指日之戈與子同仇應先擊祖逖渡
江之楫又云濟則君之靈爲臣無二心在人之內誓死
靡他讀之覺忠義之誠溢於言表

凡將篇

司馬相如凡將篇云鐘磬笙笙筑坎篪同時柏梁臺詩
云枇杷橘栗桃李梅句法相類其源蓋出於詩經椅桐
梓漆鰈鱗鯉等句而七字成句則如禮記喜怒哀懼
愛惡欲爾雅永悠迥違遐闊緝熙列顯昭皓頌等語

已肇其端迨史游作急就篇稻黍稷稷粟麻杭等句亦
皆以七字隸七物後世詩人多效之如韓昌黎陸渾山
火詩鴉鵲雁鴈鵲鵲蘇東坡韓幹牧馬圖詩騶駼駼
駼駼劉青田二鬼詩蚊蠅蚤蠅蠅蚋等句其尤
著者也

師古

事必師古然亦何可泥哉齊泰黃子澄援漢削藩之議
而燕師以起楊士奇楊榮引棄珠崖之說允安南黎利
立陳氏爲後遂致棄地殃民馬中錫效翼遂化渤海盜

事撫令流賊解散卒無功致謗下獄死漫言法古而不
審時度勢以圖之鮮有不敗者也

文辭襲用

古人文辭有不嫌襲用者鄒陽諫吳王書云鸞鳥累百
不如一鸚鵡樊準薦龐參書用之孔融薦禰衡書亦用之
三國志呂蒙傳亦用此語

鄭荃陽

明崇禎時武進鄭荃陽翰林郢以杖母之誣受極刑漳
浦黃忠端公道周謂正直而遭顯戮文士而蒙惡聲古

今無甚於此者餘姚黃徵君宗義作崇陽墓表謂公爲
如相溫體仁所陷路人知之而杖母流言君子能亮之
以理未必驗之以事也水落石出余詳之公卿之賢者
儀部崇陽之父振先眷一妾其夫人不能容儀部遂挾妾以出
流轉僧寺頗爲人所指目公無可奈何而夫人篤信佛
乘與一尼甚暱公求尼爲之勸解尼神道設教假箕仙
言上帝震怒將降禍於夫人夫人受戒悔過儀部始得
安其室一時好事相傳以竹筴參話之法訛爲扑作教
刑之事當公之受誣欲陳其本末則恐有礙於父母故

憐隱忍就死齋寃於地下豈非仁者之心與雖然儀部
之眷妾夫人之妬親之過小者也使公蒙詆醜大誹於
天下其輕重可無辨乎是故公之獄不明則奸相之惡
不著此後死者之責也峯陽事載於明史者未詳得徵
君之文而始自吁以莊烈帝之偏忮溫體仁之狠賊鍛
成此獄可謂奇寃

爲學之道

凡爲學之道見聞欲其博術業欲其約蕭山毛太史奇
齡作詩古文必先羅列滿前考核精細方伸紙疾書其

夫人陳氏性悍始以毛有妾曼殊輒置於人前曰爾輩
以毛大可爲博學耶渠作七言八句亦必癩祭所成毛
笑曰動筆一次展卷一回則典故純熟終身不忘日積
月累自然博洽嘉興錢文端公陳羣少時嘗聞於秀水
徐閣學嘉炎曰學何以博徐曰讀古人書就其篇中最
勝處記之久乃會通後述於朱太史彝尊朱曰斯言是
也世安有過目不遺一字者耶姚姬傳比部嘗倣作詞
嘉定王太常鳴盛語休甯戴太史震曰吾昔畏姬傳今
不畏之矣彼好多能見人一長輒思並之夫專力則精

雜學則粗故不足畏也姚聞之遂不作詞且多所捨棄以古文名世余按此三者皆爲學切要之言有志者當奉以爲法

王文成公用兵

王文成公好講學而精於用兵其討大帽山賊師富也指揮覃桓縣丞紀鏘戰死公親率銳卒屯上杭佯退師出不意搗之連破四十餘寨遂擒師富其討橫水賊謝志山也先遣四百人伏賊巢左右進軍逼之賊方迎戰兩山舉幟賊大驚謂官軍已盡犁其巢遂潰乘勝克之

其勦餘賊於九連山也山橫亘數百里陡絕不可攻乃簡壯士七百人衣賊衣奔崖下賊招之上官軍進攻內外合擊禽斬無遺宸濠之亂慮其出長江順流東下則南都不可保因先遣閒謀以計撓之凡此皆出奇制勝所謂兵不厭詐非小儒所能知也

从吉

三年之喪乃凶禮之大者世俗居喪而通名以慶賀必書从吉失禮甚矣至父歿母存則曰孤子襲古昔有國者之稱通人亦嘗辨其非然猶可援孟子窮民之說以

爲解未若从吉之尤謬也

至公堂

貢院至公堂有

高宗純皇帝御題聯云立政待英才慎乃攸司知人則
哲興賢其天位勗哉多士觀國之光又

御題七律四首結句云寄語至公堂裏客莫將冰鑑負
初心大哉

王言詢足爲主文者儀式也

父子同試鴻博

康熙己未博學鴻詞科有父子同試者山陽張鞠存吏部新標毅文太史鴻烈是也吏部以順治己丑進士官中書擢主事時漕使者任諸蠹胥播惡江淮問吏部甫釋褐卽抗章發其惡贓累巨萬下巡按御史秦世植案贖得實竄殛有差朝野咸稱其風節

五絕佳作

杜于皇澹詠東坡云堂堂復堂堂子瞻出峨眉少讀范滂傳晚和淵明詩王百朋錫詠太白云誰道謫仙狂豪情託舉觴目無高力士心識郭汾陽以二十字渾括其

生平在五言絕句中雖爲別調然自是佳作可傳也

凌蔭沅

錢塘凌蔭沅女史祉媛丁松生丙之室也事親孝兼工
詩詞于歸一載遽卒松生爲刊遺稿翠螺閣詩詞詩如
裏湖櫂歌云桐川莊外浪迢迢攜得青樽復碧簫商略
儂舟泊何處嫩寒春曉段家橋詞如菩薩蠻云簷鈴驚
破紅閨夢曉妝人怯餘寒重纖手捲簾衣風前放燕飛
落紅紛似雪倦了尋香蝶樓外易斜暉春歸人未歸
皆清逸女史生於四月八日製有玉牌鐫與佛同生四

字

孔梧鄉

同邑孔梧鄉廣軍司訓臨海余與居同里及官台罷學
晨夕往來情好彌洽嘗贈以詩云閉戶尋真樂全忘禮
法苛閒身書供養豪氣酒消磨官冷何妨懶詩傳不在
多從游倘相許未厭數經過孔詩筆俊爽如其爲人尤
長於七律放懷云傳到千秋人幾何茫茫身世太蹉跎
出山踪跡雲無定逝水生涯夢易過可惜後來知者少
不堪前事愧吾多放懷且飲尊中酒眼底升沈一刹那

偶作云亂書堆裏置身寬我本儒生稱此官境到悟時
心漸斂過因改後夢方安不知報德談何易可惜畱名
事大難且向燈前課兒讀幾家傳得舊瓊寒

鯤濱姪

鯤濱姪憲曾秉性聰穎爲先伯父三石公所鍾愛道光
辛巳鄉試旣得復失以是抑鬱無聊復患咯血病遂棄
舉業入貲爲州吏目需次畿垣詩名藉藉大府皆垂青
焉姪與余總角時共硯席每分題賦詩吟哦達旦壯歲
睽離郵筒常寄詩酬和姪有懷余詩云讀過書應嫌我

少刪餘詩尙比人佳又云百里知難屈後賢天台杖策
望如仙平生道學兼文藝不獨才名婉鄭虔推崇過當
心竊愧之丙午余讀禮家居姪亦奉諱南還以所著繕
性居詩草見示謝華啟秀造詣乃益精矣錄其尤者於
此易水弔荆軻云萬死無迴顧荆卿亦大難囊中利匕
首眼底白衣冠熱血一朝灑悲風終古酸英雄成敗異
不必咎燕丹保定秋思和綸齋三弟秉樞都門秋思韻
云有弟長安市上游台併蹤迹海中樞弟名京華余羈
保定距三百里
家昭不易著書同作千年計識字常擔萬古愁少日有才期

用世異鄉無客不悲秋阿兄潦倒今尤甚更許添修五
鳳不岳忠武王墓云沈沈鐵像跪孤墳一代賢奸衆目
分只爲南軒能幹蠱青山寂寞曲將軍反游仙云鄉環
秘冊費深藏只是黃芽絳雪方易造玉樓難作記始知
人世有文章露筋祠云曾從江上弔曹娥又挂輕帆此
地過庸行千秋歸女子死貞死孝兩難磨

女弟子

毛西河集附徐都講詩其女弟子徐昭華所作也初昭
華請業於西河命題仿六朝體賦得拈花如自生詩云

明珠照翠鈿。美玉映紅妝。步移搖彩色。風回散寶光。蛛絲髻上繞。蝶影鬢邊翔。誰道金玉色。皆疑桃李香。擬劉孝標妹贈夫詩云。流蘇錦帳夜生寒。愁看殘月上欄杆。漏聲應有盡。雙淚何時乾。又云。芙蓉花發滿池紅。黛烟香散度簾櫳。畫眉人去遠。腸斷春風中。西河深賞識之。余尤喜其塞上曲云。朔風吹雪滿刀鐔。萬里從戎何日還。誰念沙場征戰苦。將軍今又度陰山。長雲衰草雁行平。沙磧征人向月明。思婦不知秋夜冷。寒衣還未寄邊城。曠騎三千出漢關。雕戈十萬臥燕山。月明近塞頻驅

馬尙有將軍夜獵還感慨豪宕出自閨閣洵非易及西
河序其詩云昭華旣受業傳是齋中每賦詩必書兼本
郵示子請益陸續得如千首畱其帙不忍毀去遂附予
雜文後存出藍之意云云近日袁隨園女弟子詩蓋仿
此而益臻其盛然人旣多而詩不盡佳失之濫矣

自然氣化

龍易骨蛇易皮鹿易角蟹易螯人則易齒此自然之氣
化也

揚雄

柳仲塗謂揚雄劇秦美新譏莽而非媚莽且以雄之著
書而作經籍爲聖人曾而豐謂雄處王莽之際合於箕
子之明夷王介甫謂雄之仕合於孔子無不可之義其
餘褒之者未遑悉數自朱子綱目書莽大夫而論始定
近世文人復有襲柳氏諸家之說爲雄辨白者然皆偏
護之見終無以易乎朱子之說爲能得其真也

明閣臣狀元

明閣臣百六十八人史無傳者二十六人權謹洪熙張瑛

陳山宣德苗衷正統俞綱王一嵩景泰靳貴正德袁宗皋賈詠張

壁張治呂本嘉靖呂調陽余有丁萬曆史繼偕周如磐丁紹

載朱延禧馮銓黃立極張瑞圖施鳳來天啟來宗道楊景

辰何吾騶謝陞崇禎明狀元八十九人史有傳者三十八

人而已吳伯宗任亨泰黃觀張信洪武胡廣建文曾棨陳循

永樂馬愉曹鼐宣德劉儼商輅彭時正統羅倫吳寬謝遷費宏

成化倫文敘康海顧鼎臣宏治楊慎唐皋舒芬正德羅洪先唐

汝楫申時行嘉靖張元忭沈懋學隆慶朱國祚翁正春唐文

獻焦竑黃士俊周延儒錢士升萬曆文震孟天啟劉理順劉

同升魏藻德崇禎

複句

論語有複句而不相連者如焉用佞弗如也賢哉回也
禹吾無間然矣天何言哉是也孟子亦有之戰國策史
記效之而文法益變矣

發語辭

經書發語辭尙書最多都兪吁咎嗟猷等是也論語噫
字孟子惡字禮記嚳字左傳呼字史記唉字蘧字咄字
此數字亦互見於他書至嚇字則惟莊子有之

古列女傳

春秋時婦人以全節著者詩惟其妻春秋惟紀叔姬劉
向古列女傳乃增衛宣夫人蔡人之妻息君夫人齊杞
梁妻楚平伯嬴楚昭貞姜楚白貞姬其說有異於諸家
者且晉圉懷嬴列於節義則是不再嫁矣說亦與左傳
異

潘太守詩

湖北興國潘太守觀藻官台州有年其同年某侍御以
葬父告貸不允入都嗾同列劾其過誤罷官賦畱別台
州詩爲時傳誦云爲觀日出躡三台萬八峰頭滌筆來

碧海笑看鯢變化青天自許鶴徘徊平臨箕斗空成錦
管領湖山信費才好謝石梁雙澗瀑年年花發漸離杯
休道壺瀛最上頭三山纔近好風收一磨到海真蛇
足入口浮家問鶴樓魔力能噓無縫塔含砂偏射下灘
舟波濤見慣歸帆穩山月江風鄂渚秋桃源歸遡楚
江清十萬花光夾岸迎宦海浮沈今結局堯天歌詠
付餘生黃冠紫綬都如夢紅樹青霜餞此行莫待瀟湘
芳草綠春山處處子規聲書生面目太酸寒試著初
衣覺便安不厭清貧求小耗也須福慧了塵官無田致

悔歸田晚到海信知觀海難敢對西風怨搖落賦閒原是賦秋潘

唐伯虎

宋有二唐伯虎一眉山人唐庚之兄初名瞻後名伯虎見宋史文苑傳一全州人進士終梧州推官見王輦隨手雜錄

臭字入詩

臭字入詩少陵朱門酒肉臭道有凍死骨獨有千古中州集劉內翰瞻廚香炊豆角井臭落椿花亦自可誦然

不可以擬杜詩矣

賦韻

賦韻以四平四仄爲率後唐莊宗時覆試進士翰林學士承旨盧從質以后從諫則聖爲題以堯舜禹湯傾心求過爲韻五平三仄爲識者所誚近世賦韻有七平一仄者如嚴子陵釣臺賦以先生之風山高水長爲韻是也有一平七仄者如杜甫觀公孫大娘弟子舞劍器賦以撫事感慨作劍器行爲韻是也此豈古法所宜有乎

孫春沂

杭州孫春沂貳尹曰點寸園伯父之壻也工書善弈豪
於飲兼好吟詠試北闈屢薦不售乃筮仕江蘇非其志
也詩句如生涯棋局在心事酒杯知文字空餘知己淚
湖山易動故園心詩句欲成燈有味春寒猶在酒無權
皆清逸可誦

孔大令

吾邑孔蔚廬大令廣平生而早慧九歲詠御爐香云夜
深常繞君王譙不逐寒風去渺茫有先達某公歎曰此
韓冬郎再世也宰陸川縣折獄至愼嘗攝北流縣事歲

早勸民平糶而豪家皆居奇以待厚值細民弗堪相率
掠其儲粟適提鎮在州縣去州近豪家夜奔訴各張大
其詞開列劫盜數百人提鎮不察按牒廣捕概予重杖
貫其耳縛示衆捕勢如風將激變急詣提鎮請盡付之
細鞫其情實首事者坐以長流次責懲有差觀望者盡
釋之豪家及無賴皆帖服其事親至孝母有痺疾發時
轉側需人躬自扶掖不假手於人病劇倉皇避人涕出
膏母糞爲其妻陸孺人所窺見禁勿語陸臨歿始泣以

語子婦云

左忠毅公

左忠毅公光斗嘗言元祐去亂法不去亂人爲錯又言李伯紀知爭事不知爭人事之失一事人則無窮皆名言也被逮時勉其弟曰率諸兒讀勿以我戒而謂善不可爲覺范滂吾欲使汝爲惡則惡不可爲使汝爲善則我不爲惡二語猶傷於激

裴晉公

宋強至韓忠獻遺事謂公論近世宰相獨許裴晉公公又嘗云若晉公點檢著亦有未是處君子成人之美不

可言也不知公摘晉公何處恨不得聞之竊意宰相當
佐人君進賢退不肖晉公歷相四朝勳德隆茂無可指
摘惟劉蕡以對策詆宦官見謫諫官御史交章論其直
李邕上疏請回所授官以旌蕡直晉公於斯時不能採
羣言以回君聽擢蕡而用之忠獻所云豈爲是歟

蔡明經

德清蔡明經壽昌少有神童之稱趙太守學轍府試愛
其才以女妻之嘗偕遊碧浪湖趙口占魚鱗水紋圓到
岸句命之對卽應聲曰龍嘘雲氣直冲天後卒於都門

年僅三旬士論惜之

瑀華妹

長妹瑀華貞靜而慧八歲讀詩經唐詩俱成誦十歲學
爲詩出筆韶秀先伯父石公見之曰此吾家女學士
也性不喜華飾屏棄粉黛有諷以穉年非所宜者則曰
自有本來面目安用俗艷爲許姻同里嚴琴史茂才銓
年十六病卒著有裁香室詩鈔一卷摘錄數首於此漫
興和定圃兄韻云佳境可行樂莫愁生有漉杯邀千古
月庭種四時花山色當門近泉流繞屋斜揮毫成一笑

得句漫籠紗。冬日沈纖雲。表姊韞珠姪女過談。有作云。
北風吹不盡寒意。入簾來。庭積未殘雪。室藏將放梅。恰
逢知己至。頓使笑顏開。擬共圍爐坐。攜樽倒綠醅。舟中
卽事云。春光已滿畫橋西。野岸周遭望欲迷。流水聲中
孤棹遠。夕陽影裡遠山低。沿堤柳葉藏鶯語。夾路花香
襯馬蹄。載酒歸來天正晚。一鉤新月挂前溪。枕上云。欹
枕當寒夜。殘更隔院催。新詩吟未穩。迸入夢中來。偶作
云。一桁花枝壓畫簾。小窗日影上書籤。恐妨梁燕歸巢
路。滿院東風不下簾。過蠡澤云。橋邊烟影淡無痕。橋外

春波綠到門十里東風吹不盡桃花開遍夕陽村

義田

吾親石門蔡學博載樾承其父大令德淳遺命仿范文正公義莊之法爲田以贍其族人乃與從弟載坤合出七百萬錢以七之一爲祠祀先人又思田不可遽得以六百萬錢入質庫歲得息錢四十二萬族中之貧獨五十以上者婦女寡而不嫁者幼孤無養者廢疾者計日給米五合錢十文青年守節者倍之冬夏各給以衣帳斂死者買公地葬之大小試各有贈獲尙者加厚焉六

十以上遇生辰各有贈視其年以定輕重會墨酷吏及
民爲匪類墮其家聲者雖妻子屏不與告於邑令爲規
條以垂永久其時在道光六年九月寶應朱文定公師
士彥爲作記以傳竊思尊祖收族之道莫善於義田自
文正公創始後效法者代不乏人此舉規模雖不及前
人然量力而行俾族人不致失所其意甚厚誠使世之
擁高貲者皆能遵而行之其有裨於風俗人心豈淺鮮
歟

謝侍郎

謝金圃侍郎屢掌文衡鑒別精覈乾隆辛丑主春官之
試同事者有吳侍郎玉綸士之不第者造爲蜚語曰謝
金圃抽身便討吳香亭倒口卽吞二語實本寄園寄所
寄言者以聞侍郎曾督學江蘇吳亦曾督學福建

高宗純皇帝密詢兩省大吏江蘇巡撫閔鶚元覆奏以
道路之言事無實迹而閩督李侍堯有幕客李三俊亦
辛丑之不第者代李草奏文致其詞

上以事雖無實清議不諧於是吳降三品卿侍郎亦降
爲內閣學士後於己酉歲三月初 上書房諸臣以會

試期近候主文之信同時皆不入直因此並予謫降侍郎遂降爲編修免入上書房嘉慶中追贈三品卿侍郎於乾隆己亥典試江南得長洲錢開學榮置解首辛丑主試春闈閣學會殿試皆掄元而是科所取曹文正公德州盧文肅公皆爲名相得人之盛一時莫與並云

張太史聯

某記室隨王尙書麟塞外數年甚見推重玉卒後某乞人代爲輓聯鮮當意者時平湖張海門太史金鏞以計

偕入都爲撰句云旣後記載衣雪窖冰天萬里追隨班
定遠長安仍索米駭肩火色九衢慟哭馬賓王蒲城相
國王文恪公師見之極口褒賞旋入詞垣才望著一時
焉

稱人爲官

俗稱人爲官繫以姓與行初唐人文往往有之如王勃
序云張二官松駕乘閒桂筵追賞又云朱五官芝庭襲
譽盛文史於三冬桂幄凝懽照綺羅於九夏又云白七
官天台傑氣地乳奇精楊炯序云楊八官金木精靈山

河粹氣駱賓王序云尹大官三冬業暢指蘭臺而拾青
薛六郎四海情深飛桂尊而舉白又云聞五官言返維
桑修途指金陵之地李六郎交溪投漆開筵浮白玉之
樽今則罕有以此稱入文字者

建文帝

明史書建文帝自焚而於程濟傳書金川門啟濟亡去
或曰帝亦爲僧出亡濟從之莫知所終蓋野史皆言出
亡故亦存其說也

一二鳥詩

韓文公二鳥詩方崧卿據歐公感二子詩及東坡李太白畫像贊以爲爲李杜而作柳仲塗以爲刺釋老朱子考異以爲爲已與孟郊而作按詩中不停兩鳥鳴大法失九疇周公不爲公孔邱不爲邱等語似與方朱之說不相符合當以柳說爲長

何文肅公

明孝宗朝何文肅公喬新爲劉吉所憎罷歸十四年中外多論薦竟不復起嘗貽李錢書云歸田以來憂患不干於心毀謗不入於耳視陸宣公在忠州蓋過之矣方

壯時猶不如人況老且疾豈可再起以取後生描畫哉
倘相知有問及者煩告之曰老病日侵不堪當世用矣
自古及今再起者孰能善其終哉寇萊公王三原且然
況其他乎此非特立品之高抑亦知幾之哲吁使夏貴
溪能知此義亦不至於殺身矣

七李杜

李杜有七漢李固杜喬李雲杜衆李膺杜密魏書世宗
詔王肅曰英惠符於李杜此合晉杜預魏李冲而言之
唐李白杜甫李商隱杜牧朱李韶杜範又新唐書杜密

言傳少與李嶠崔融蘇味道爲文章四友世號崔李蘇杜至杜子美詩云李杜齊名眞忝竊又指李衙矣

蘇紹

康對山武功縣志人物蘇氏最多然如蘇則之孫蘇愉之子蘇紹金谷園賦詩最勝見世說新語獨不採入豈以其僅爲文人如通鑑之不載屈原杜甫耶纂紀亦綦嚴矣

尊經閣祀典

金代嶧教授司鐸臨安用全謝山太史尊經閣祀典議

而稍變通其說恪遵功令以十三經注疏爲主參以大戴禮記國語說文其已入兩廡者不贅易祀王弼韓康伯孔穎達詩祀毛亨周禮儀禮祀賈公彥禮記祀戴聖左傳祀杜預公羊祀何休徐彥穀梁祀楊士勛孝經以唐明皇未便列入專祀邢昺論語祀何晏孟子祀趙岐孫奭爾雅祀郭璞大戴禮記祀戴德盧辯國語祀韋昭說文祀許慎外增祀功在羣經之河間獻王劉德暨作諸經音義之陸德明共二十一人餘不概及據所讀書而言也學使者姚伯昂侍郎允其請爰設栗主於閣

上以春秋二八月仲丁祭之醴錢百金生息以供祭品
其祭文云伏惟起以義者有未見之禮六傳其言者居
不朽之名三況乎挾經心而執聖權闡微言而明大義
以先覺起後覺實經師爲人師茲際清時特修曠典等
舊德先疇之食報陋儒林道學之分途馨香補兩廡之
遺詒訓仍專家之守治崇正學 朝廷敷醴化於鼓鐘
禮奉先師庠序肅明禋於俎豆尚饗涖官溫州教授又
奉祀許鄭二儒於倉聖祠手題聯扁倉聖祠扁云聖德
天生聯云作黃帝史官記動記言鼻祖神靈明四目開

元公爾雅釋詁釋訓耳孫著述衍三蒼許公叔重龜扁
云學祖聯云家傳十四篇書合三蒼爲一律諷九千字
學通五經無雙鄭公康成龜扁云經神聯云微言守遺
當奉大師爲表幟實事求是敢從二氏問傳薪

神缸

天台縣署三堂有神缸人犯之每有殃咎胥吏等歲時
禱祀恆宰雞漚血以祈福余於壬寅夏至署見之缸覆
地上四圍離地寸許高不及二尺圓徑三尺有餘血痕
凝漬其上仁和沈蘭亭煌有記刊於壁其文曰五福神

相傳卽缸神也守斯土者朔望必祭神之靈爽始於

本朝康熙間以是縣志無可考袁簡齋太史續齊諧會
記之未之詳也煌於道光癸巳秋就館茲邑詢之父老
及署吏始知其說有三一曰縣署向屬審基是爲審神
然縣志載署治厯年久遠並無增擴之舉其說似不足
信一曰神缸

本朝初由海門逆流而上至青溪乃止內有五蝠隨波
不散邑令神之因迎入署卽五福神缸之說歟而一則
謂其下有井前明有投井殉難者後人以缸覆之而懸

不著地其由忠烈之氣上升而使然耶阮芸臺協揆督
學浙東時曾一發之果有井噫此三說也其殉難之說
爲可信焉夫天地之大何所不有石言華降史冊昭然
况秉乾坤之正氣焉有不歷久彌新者乎天台爲仙境
爲佛地無怪鍾靈毓秀甲於他邑又豈獨堂東之神桂
云爾哉余聞之縣吏云巡撫阮公元發缸後卽丁內艱
去其時學使劉公鳳誥亦發視之未幾以科場事獲譴
自是邑人奉祀益虔

外吏起家入閣

大學士自外吏起家者陽城田文端公從典康熙戊辰
進士爲英德令泰安趙公國麟康熙丙戌進士爲長垣
令趙公宰邑時勘災足浸水中三日故病跛每入朝許
給扶以行

王惺齋大令

嘉興王惺齋大令元啟積學工文手批歸震川文集抉
發精當摘記數則於此讀書各有所見如一部史記古
今人稱美者累千百言未已吾獨謂妙處只是層理清
晰震川文亦然 震川文只落筆處一二語便定一篇

之局自後雖波瀾百變而皆不離其宗蓋篇篇如是故能隨方布陳而無一成之轍迹可尋其妙在一切字

震川文只是一個精切而有條理人徒以寬博目之不知震川者也 人但知震川文學史記見有感慨處便謂學史記不知震川之文之妙在意理稠疊而摺皺分明此其所以爲真史記也 太史公爲吳王濞列傳首尾四千餘言結云初吳王首反并將楚兵連齊起正月起兵三月皆破獨趙後下只用二十四字括盡震川陶節婦傳結云婦年十八嫁於舸十九喪夫事姑九年而

與其姑同日死卒葬之清水灣在縣南千墩浦上只用三十餘字真有一口吸盡西江之勢昔人所謂命世之筆力也

案

案有以爲床者周禮天官王大旅上帝則張璫案是也有以爲食器者考工記諸侯以享夫人案十有二寸註云玉案是也有以爲几者許氏說文所云几屬是也張平子四愁詩何以報之青玉案註以爲古盥字當是考工記玉案遺製史記萬石君傳對案不食田叔傳趙王

張敞自持案進食後漢書梁鴻傳舉案齊眉蓋皆指食器言也揚子方言案陳楚宋魏謂之檣自關東西謂之案當亦指食器類書有屬之几案者似誤蓋方言皆以類相從案在盂盤栴盤栴落箸筯之間故知其爲食器也

維莫之春

詩維莫之春句法絕奇王元長曲水詩序引之以粵上斯已爲偶蓋卽仿其句法

疏表傑作

本朝疏表傑作備於儷體金膏一書其最佳者如禮親
王永恩等請祝 萬壽表云建極保極會運世乃統於
元大生廣生祿位名必得其壽直省將軍督撫永瑋劉
莪等請祝 萬壽表云極天所覆偕一十七省而其樂
舒長入人也深閱五十二年而彌加淪浹又云雖天地
爲心如父母不言施報而歲月以冀卽愚賤亦具性情
大學士公阿桂奏請編輯八旬盛典疏云九五演易九
五演範疊五策天地之全八千歲春八千歲秋積八八
宮商之頌又云嘉筵紹於 彤墀老吾老及三千叟太

和光於部屋孫生孫者二百家兩廣總督孫士毅等賀
平臺灣林爽文表云波澄海國看

王師洗甲而還春暖臺陽慶邊黎啟扉而臥歷溯
聖主當陽之

顯烈敢以削平蝸角遶事頌颺而仰睹

先幾燭照之

府籌則卽綏靖鯨身亦繩

祖武禮親王謝

賞平定臺灣告成

熱河

文廟文摺云書誦者萬本

萬徧越七觀六義以垂型受藏而三沐三薰合四海九州而忭頌大學士朱珪謝進

御製說經古文跋論摺云百四十四篇之經訓日月光懸八千大千世之心傳孔姬道貫

作而善述合文思勳業於

一人

君實兼

師示心學躬行於萬禩戶部侍郎曹文植請貤封胞伯故廩生曹某云廿年家塾劬勞不異於所生一品朝榮

追逮忍歧於自出大學士于敏中謝

賜雙眼花翎云若朝陽之翔翮羽罕能比此文章如順風之遇鴻毛安足方斯遭際河南巡撫和蘭謝

賞戴花翎云動色凜梁鵠之翼豈徒聳異於觀瞻關心比池鳳之毛倍切欽承於負荷蒲田鄭王臣謁

陵表結聯云繼封禪七十二君九握貞元之秘後天皇萬八千歲長爲仁壽之君皆堂皇博大不愧作家

九言詩

九言詩最難自然協律用以頌聖尤難嘉慶己卯年

六旬萬壽鄭笏君孝廉代某尚書作九佳全韻詩端莊
沈麗傳誦一時篇長不及備錄摘書起結以見一斑起
云

皇帝御宇二十有四載

乾行不息百福頌孔皆海隅日出幸生 太平世衢歌

巷舞直到 長安街三皇各稱一萬八千歲我

皇之德更與天地偕結云軒轅以來四千五百歲閭閻
推算無如 今茲佳八百廢歌卿雲糾縵縵九成樂作
鳳凰鳴喈喈微臣願效葵藿向陽意導涓洎海深愧盤

泥蛙蕪祠謹綴九百九十字竊符九九之數陳 堯階

吳柳塘詩

震澤吳柳塘茂才祖修淡於聲利壹志丹鉛詩主清新
如蕪湖絕句云關吏狎狎去復還客囊顛倒在江船書
籤莫怪無人檢文字何曾值一錢除夕七絕云半落從
他歲序遷絕無人怨與人憐平生受盡癡獸益論價應
須十萬錢法雨泉云山顛高下勢滌洄時爲琮琤聽一
回世上濁波流不盡此泉莫放出山來皆有爲而作者
余尤愛其送查韜荒攜家還海甯斷句云何堪久客逢

歸棹况復中年別故人情溢於辭令人尋諷不厭吳有
僕楊清能詩題琉璃河關壯繆廟有鐵槍不爲米溫死
此地如何廟壽亭句命意亦新

初三月

道光丁亥偶與嚴比玉太守閱吳滄川明經南野草堂
筆記有與吾邑汪霽堂濂作初三月酒令吳先成令云
初三月玉一鉤問何人挂在柳梢頭注云初三月影纖
纖學姮娥斜樣兩頭尖吳續令云初三月似指爪半彎
兒指破青雲表汪亦續云初三月未分明想佳人睡起

眼纔醒余謂比玉曰此吾鄉故事也曷效之比玉因成
令云初三月映殘暉鏡開奩纔露影些微余云初三月
魄生剛訝高懸弓勢未全張比玉續云初三月逗簷端
似廣寒宮瓦覆彎彎余亦續云初三月色無多要團樂
須吟浹辰過時比玉之弟佩仙分守在座亦成令曰初
三月吐華新宛天仙妝罷半開脣今二君已皆宿草回
溯前塵恍如春夢因追憶而備錄之

塵角解

時憲書十一月改塵角解爲塵角解始於乾隆戊子年

高宗純皇帝以爲木蘭之鹿吉林之麋角皆解於夏惟麋角解於冬曾於南苑驗之時王其訛又

命時憲書紀年仍增注六十一歲至百二十歲使花甲環周益綿壽世之慶蓋始於乾隆辛卯年云

顧亭林獄事

顧亭林獄事志乘未詳見於與顏吏部光敏書特錄其略先是蘇州沈天甫施明夏麟奇呂中偽造忠節錄託名已故祭酒陳仁錫譏毀

本朝羅列江南北之名士巨室以爲挾書之具又偽造

原任閣輔吳姓一序詐其子中書吳元萊銀二千兩事發刑部定獄卽將沈天甫等斬決此康熙五年中事也次年萊州卽墨黃指揮培之僕姜元衡刪易此書增入黃氏唱和詩控其主與兄弟子姪作詩誹謗

本朝又與顧亭林搜輯諸人詩皆有訕語處士於七年二月在京師聞之卽出都抵濟南幽繫半年因援沈天甫故牘謂姜元衡所控之書卽沈天甫等陷人之書事旋解株連二十餘人均得開釋處士賦詩六章紀其事有偉節不西行大禍何由解之句又末章云天門詆蕩

蕩日月相經過下閔黃雀微一旦決網羅平生所識人
勞苦云無他騎虎不知危聞之元彥和尚念田書言此
舉豈足多永言矢一心不變同山阿詩集中皆不載詳
見顏氏家藏尺牘

汪文端公

山陽汪文端公廷珍爲大司成時訓迪勤密取文以清
眞雅正爲宗一時人才彬彬極盛會稽莫侍郎晉德化
鄭太史兼才才藻尤富皆爲公所賞識莫嘗戲謂鄭曰
吾若典試必能取子爲元後莫先入詞林嘉慶戊午歲

典試福建鄭杲以第一人登科士論翕然皆無間言夫東坡於李方叔尙有眼迷五色之歎以今方古實乃勝之矣

對聯複字

對聯有以複字見長者歸安徐阮鄰師保字題甘肅鹽茶同知署云回民漢民多是子民我最愛民無異視禮法刑法無非國法爾須畏法莫重來鳳臺余菊農觀察士璵題送子觀音祠云大德曰生願衆生生生不已至誠無息求嗣息息相通安化陶文毅公澍題育嬰堂

云父兮生母兮鞠無父母有父母此之謂民父母子言
似孫言續獅子孫卽子孫以能保我子孫蔡東軒學博
司訓江山縣歲饑勸各大姓輸粟平糶題聯於堂云盡
力盡心未能盡職任勞任怨不敢任功

眞賞難逢

世俗以夫婦之事爲敦倫以使令奴僕爲飭紀嘉慶己
卯科吾浙秋試某房官閱文見有飭紀敦倫句大駭曰
敦倫豈可飭紀怪誕極矣亟以筆直抹之同邑盧茂才
康錫應秋試被放闕文用舍重而徒句爲房官所抹沈

茂才逢源歲試前列文川曾南豐真人出而天下平句
旁評云杜撰余親見之可知場屋文字真賞難逢卽尋
常語句亦有被抑者更何得炫異求新乎

俚語本佛書

俚語有出於佛書者偶閱唐釋元應一切經音義漫識

於此肩毛

成具光明

脅肋

四分

膿血

增一阿

床鋪

佛本

經鑰匙

雜寶

店肆

中阿

喫酒

無量清淨

搔蟻

賢愚

欺侮

勝天王

經須賴

調戲

解脫

擡舉

舍利弗

阿

痕迹

解脫

狗咬

大威德陀

羅尼經

韓詩外傳

隋志韓詩外傳十卷李善注文選引孔子登泰山觀易
姓而王者七十餘家事及漢皋二女事徐堅初學記引
魯哀公穿井得玉羊事今本皆無之蓋十卷雖仍隋志
之舊而已非全書矣

論衡

王充論衡毀聖訐親獲罪名教其餘誕妄之語難以悉
數至論行善福至爲惡禍來謂由於遭遇適然不因人
事是與易積善有餘慶積不善有餘殃書惠迪吉從逆

因之旨顯相背戾不將率天下之人去善而就惡乎古
今來骨理之書鮮能傳世此獨歷久不廢者蓋其引證
浩博才辨宏肆而篇帙繁富亦時有平正之辭足以矯
俗祛僞也學者於此書當審擇而節取之

璊

程氏大昌演繁露云說文璊赤玉也詩有璊璵玉佩左
氏楚子玉爲璊弁玉纓皆對別言之若等爲一玉不分
言也今人用璊比梅雪皆誤余按詩木瓜篇毛傳云璊
玉之美者則與玉對舉安知不以精粗爲別耶又按齊

風毛傳云瓊華美石瓊瑩石似玉瓊英美石似玉其言似玉則色白可知似不必泥說文之言

杯中角影

晉書樂廣傳載杯中角影事與風俗通義所紀杜宣事絕相類二書文法各異而晉書簡要勝之

明史體例

明史體例極精姚廣孝入列傳不以僭許之也秦良玉入列傳不以女視之也閹黨佞倖姦臣列於宦官之後流氓之前其嫉之也深而貶之也至矣

語意相似

史漢有語意相似而叠用者略識於此史記空言虛語

高祖本紀內外表裏體踰年歷歲趙世家延年益壽商君匿意

隱情張儀露兵暴師主父漢書年哀歲暮馮衍俊雄豪

傑蒯通飄至風起蒯通道遼路遠中山靖王勝傳天下少雙海

內寡二王邱壽招殃致凶李尋殘賊酷虐苛刻慘毒方

進等盛齊隆王莽窮凶極惡王莽思過念咎郎顯道盡

塗嬋司馬相後漢書歡欣喜樂馬融怨恨忿懟孫程陟

危歷險作都

郭子儀

新唐書高郢傳郭子儀怒判官張曇奏抵死郢引奏甚力忤子儀意下徙猗氏丞南部新書謂郭令公惟奏杖殺張譚物議爲薄譚卽曇之訛也汾陽盛德乃有此事是可知懲忿之難

文章流別論

摯仲洽文章流別論以交交黃鳥止於桑爲七言以洞酌彼行潦挹彼注茲爲九言與毛詩異讀其說當有所本然玩其文義自當斷讀爲宜

豫章行樂府

薛道衡豫章行樂府云不爲將軍成久別只恐封侯心
更移視唐人忽見陌頭楊柳色悔教夫婿覓封侯意更
深曲不獨空梁落燕泥句足以動人也

清和

長洲沈歸愚尙書德潛說詩晬語謂張平子歸田賦云
仲春令月時和氣清明指二月謝康樂詩首夏猶清和
言時序四月猶餘二月景象故下云芳草亦未歇也自
後人誤讀謝詩有四月清和雨乍晴句相沿到今賢者

不免云云按歲時紀四月朔爲清和節又魏文帝槐賦
伊暮春之旣替卽首夏之初期天清和而溫潤氣恬淡
以安治謝元暉詩麥候始清和劉士章詩首夏實清和
是以四月爲清和不始於宋人矣

飛英塔

湖州飛英塔在北門眠佛寺主闔郡文風乾隆甲寅塔
圯重修五年之間出兩殿元乙卯王勿菴侍郎以銜至
道光乙未塔又圯闔郡會試遂無一人登第丁酉重修
戊戌鈕松泉庶子福保大魁甲辰周縵雲侍御學濬以

第二人及第嗣後科甲復盛風水之說非無憑矣塔高四十餘丈中又有石塔高數丈己亥秋余與烏程周蓮伯孝廉學濂昆弟登其顛梯級玲瓏躡空而上蓮伯有詩紀遊云浮屠涌招提報德資鎮奠侈剝生輝光象教力能變七級森嵯峨八窗互貫穿密勿窮攀躋危梯躡螺旋騰身壓鵬鷃矯首切星漢衆山蒼弁來環衛若驚忭其區亘北戶際天渺無岸俯攬孤城中一氣入凌眇短樹牛毛疏連蔓蟻垤間是時風日佳天宇肅清晏爾雲慙未能自笑樊籬鷁愿乞飛霞佩攜手游汗漫

華陀廟聯

客有述華陀廟聯云未劈曹顱千古恨曾醫關臂一軍驚又云岐黃以外無仁術漢晉之間有異書稱前聯尤佳余謂曹顱關臂事皆不見正史不若後聯之大方也

徐冲晦

徐冲晦處士宋仁宗時召對除大理評事固辭後居杭之萬松嶺精象數謂子孫世世勿離錢塘永無兵燹按徽宗宣和三年方臘作亂十二月二十九日陷杭州縱火六日官吏居民死者十三二月王師水陸並進戰六

日斬馘二萬十八日再火官舍學官府庫與僧民之居
翌日霄遁大兵入城臘旋就擒計臘所陷杭睦歙處衢
婺六州與五十二縣所殺平民不下二百萬是冲晦之
言亦未必驗特宋元革除之際兵不血刃安堵如恆異
於他處之屢遭殺戮耳

瘡方

餘姚吳蓉峰學博麟書患膿窠瘡醫久不痊後有相識
遺一方云得自名醫爲療瘡第一良藥如法治之果愈
余於庚戌年患此甚劇亦以此方得痊茲錄於左

廚房倒挂灰塵

三錢銀
伏地氣

松香

錢一
茴香

花椒

錢一
硫黃

銀一錢

癩蝦蟆

錢一
枯礬

蒼朮

錢一
白芷

硃砂

錢一

右藥其研細末用雞子一箇中挖一小孔灌藥其中
紙封固口置幽火中燉熟輕去其殼存衣再用生豬
油和藥搗爛葛布包之時擦瘡處

元真子祠聯

平望平波臺元真子祠有聯云泛鏡水干腔歸來餐菰
飯蓴羹地真仙境聽棹歌一曲隨處有荻花楓葉我亦
漁人筆意瀟灑可喜

蒙求

蒙求一書所以資童幼之誦習作初學之階梯晉李瀚創爲之徐子光爲之注名曰蒙求集注宋王逢原又作十七史蒙求明姚光祚又以王逢原所作未備從而廣之分三十七名曰廣蒙求然有對偶而無韻注又簡略劉班取兩漢事括以韻語名曰兩漢蒙求王芮歷敘帝王世代略述古今事蹟名曰歷代蒙求徐伯益集婦女事實爲韻語名曰訓女蒙求元吳化龍集左傳事爲韻語名曰左氏蒙求胡炳文集嘉言懿行可爲則效者

屬對成文以啟導初學名曰純正蒙求此數書今世尙有其本而得採入

四庫中者則惟蒙求集注純正蒙求又有爲諸家所著錄而其書罕傳者則如名物蒙求三字蒙求蒙求增注廣韻小說蒙求宋范鎮本朝蒙求胡宏敘古蒙求孫應符家塾蒙求宗室蒙求宋舒津蒙求續蒙求和李翰林蒙求之類是也

文選

唐初李善與許淹公孫羅並承江都曹憲爲文選音訓

蒼雅之學而李注盛行於世與顏師古漢書注並稱開
元中呂延祚復集呂延濟劉良張詠呂向李周翰其爲
之注與李氏注並行然當時文士如李匡父作資暇錄
邱光庭作兼明書深斥五臣之謬遠遜李氏之精核大
淹通如李氏其所未詳者且百有十四亦可見此書之
博奧有未易沿討者矣唐宋士人皆習此書迨熙豐間
王安石著三經新義頒於學宮主司以之取士於是以
穿鑿爲能以附會爲工而選舉漸廢然而承學之士代
不乏人精於是者若洪氏邁王氏應麟皆有論辨足以

發明其旨趣蓋其書歷久常新故其學閱久弗替後人雖有廣文選續文選等書終不能與之爭衡也

安儀周

周芸皋觀察內自訟齋文集載朝鮮安儀周事甚奇其略云儀周名岐從貢使入都偶於書肆見抄本書不可句讀以數十錢購歸細玩之解乃前人密金地下錄其數與藏處皆隱語徧視京都惟明國公屋宇房舍似之卽世所稱大觀園也乃求見明公曰公日用以千萬計度支將不給願假金十萬不問所之三年還報因指所

坐室柱曰發此磚可得金如數公笑命具舂牖獲如所言遂付之去至天津業鹽爲商三年還謁曰幸不辱命息三倍公曰是亦不足供吾用願再爲我謀曰無已則假金百萬公笑曰安得發地再得之儀周起請徧觀諸室至寢門內曰是可得發而與之乃至揚州爲商三年報曰倍之俟公取用公曰其再經營之又十餘年儀周老辭歸國公畱與飲食曰若異人有異術曰非也岐得異書知藏金處請爲公盡言之因一一指其處公曰若不需耶曰此公物天以與公者仗公福已得贏餘足自

給拜公賜矣儀周好賓客濟貧困多豪舉富收藏盡以書畫歸國子孫匪者爲安氏觀察謂儀周知物之有主不妄取而以力取其餘似有道者余謂儀周躬自致富而能施與不吝崇尚風雅誠足誌也

齊名

韓柳齊名而聲氣異元白齊名而志節殊觀其平時酬贈惟事辭章責善之風邈矣

明政

明多敝政閭臣奪情典禮替矣廷臣予杖刑章悖矣厥

臣侵權名位紊矣莊烈帝勵精圖治不能改其失此所以終不競歟

朝邑志

王阮亭謂韓五泉朝邑志與康對山武功志並稱先輩稱爲巨麗今按朝邑志字僅五千七百餘筆墨簡古洵爲傑作然名宦不載事實選舉不載年歲失之太略紀楊恭報復知縣事乃小丈夫所爲未免採擇不精未若武功志之簡而能核也

成仁取義

文信國公生於宋理宗端平三年丙申五月二日死於
元世祖至元十九年壬午十二月九日得年四十有七
及第在理宗寶祐四年丙辰年二十有一宋史謂年二
十蓋舉成數言也公與弟壁同舉進士後壁降元公季
弟璋亦仕於元公獄中詩有云三仁生死各有意悠悠
白日橫蒼烟又云二郎已作門戶謀江南葬母麥滿舟
不知何日歸兄骨狐死猶應正首邱又與嗣子陞書有
云吾以備位將相義不得不殉國汝生父與汝叔姑全
身以全宗祀惟忠惟孝各行其志矣嗚呼成仁取義何

人不當勉爲乃同體之親異趨若此公之所云殆以事已至斯且誼關骨肉不得不爾豈國而忘家之本志哉

李太白潁水貞義女碑

李太白潁陽潁水貞義女碑銘歐陽公集古錄趙德甫金石錄皆不著錄其文則見於唐文粹考史記伍子胥傳不誌貞義女事自太白詳述之而其事始顯夫子長世爲史官勤搜散失顧於貞女佚之因歎古今賢媛德茂行卓而湮沒不傳者可勝數哉太白詩冠有唐文亦清俊邁俗文粹所載凡二十篇大率皆投贈登臨之作

惟此文表揚幽光體裁莊雅昔曹娥孝行得邯鄲淳之碑而始著而貞女奇節亦恃太白之文而益彰迄今過瀨渚之旁世遠風微遺徽寥寂而撫覽碑銘誦明明千秋如月在水之辭猶令人遐溯英淑悠然慨慕文章之有裨世教豈淺鮮歟

知縣承襲

知縣有承襲爲之者

國初遼陽甫置縣下令能招百人往者官之義烏陳達德率百人以應授遼陽令勤墾闢招商賈興文學逾年

政化大行卒於官其子瞻遠奉

詔承襲蓋異數也時爲諸生衰經受職踵父之故轍而
循次成功邑人感慕爲之立祠歷官常州同知達德能
詩有游靈鷲句云磬入巖松初地寂龕生海月晚潮來

鄺湛若

明南海鄺湛若父子殉難事南疆繹史不載今參考諸
書錄其遺事以補之鄺露南海人初生時甘露降於庭
槐不餒母乳有慈上人見之曰此天上玉麒麟豈與人
間乳氣耶以露水調米汁餵之因名露字湛若五歲父

命作甘露詩應聲而就及長工諸體書學騎射嘗跨馬
值南海令黃恭庭行轅下騎弗及黃怒拘之御史梁森
琅爲請罪弗釋遂亡命走廣西游岑監諸土司爲徭女
執兵符者雲驛娘書記歸吳赤雅一編崇禎末補諸生
學使以恭寬信敏惠校士露五比爲文以真行篆隸八
分五體書之黜置五等大笑棄去縱游吳楚燕趙賦詩
數百篇才名大起戊子以薦擢中書舍人庚寅奉使還
廣州會王師至露與諸將死守十閱月而城陷幅巾抱
琴而死露好歌諧大言汪洋自恣以寫其牢騷不平之

氣所居海雪堂環列古器有二琴一曰南風宋理宗宮
中物一曰綠綺臺唐武德年製明康陵御前所彈也因
貧以所玩質子錢二琴亦時出入質家作前後當票序
有詩云三河十上頻炊玉四壁無歸尚典琴少嘗師事
阮大鍼泊阮羅織東林乃貽書絕交侃侃千言子鴻字
劇孟亦畸士年二十餘能詩及擊劍丙戌之役抗命不
從率北山義旅戰於廣州東郊死之贈錦衣千戶余謂
湛若奇人也乃貽書絕交守城死節是奇而能協於正
矣世有以狂目之者豈足見其真乎

荆軻

綱目荆軻書盜袁隨園非之其論甚辨余謂軻旣欲生劫秦王當先量力之能否力所不能爲而冒昧行之徒殺身湛族以速燕之亡能毋貽笑於天下後世哉竊謂史記所書刺客當以荆軻爲最下當其待客未來因太子光之請遂發怒不能姑待且知秦舞陽之往而不反而仍與偕行謀之不慎事安得成

天祿識餘

杭堇浦太史跋錢塘高江村侍郎士奇天祿識餘云不

觀左傳注妄謂經皇爲冢前之闕不觀漢書注妄引後
漢紀以證太上皇之名不觀水經文選兩注妄詫金虎
冰井以實三臺不觀地理通釋妄分兩函谷關爲秦漢
青雲二字莆田周方叔以爲有四解迺以隱逸當之
聚頭扇已見之金章宗詞咏出歸潛志乃謂元時高麗國始
貢銀八兩爲流本漢書食貨志乃引集韻以爲創獲八
米盧郎見齊隋兩書姚寬叢語云關中語歲以六米七
米八米分上中下言在穀取米取數之多也乃用元微
之八采詩成未伏盧爲證是知一未知二也余觀此書

有經書習見語亦皆采入其誌冷僻之典又多不標所
出之書至於舛誤之處亦不止此如十洲記漢武帝天
漢二年西國王獻吉光毛裘色黃蓋神馬之類入水經
曰不沈入火不焦乃謂入水不濡又脫入火不焦句古
今注荷花一名水芝西陽雜俎湖目蓮子也乃謂蓮子
湖目芡實水芝親家見後漢書應奉傳注見於史者始
於隋書房陵王勇傳乃謂見唐蕭嵩傳儀禮士昏禮云
日入三商爲昏賈公彥疏云商謂商量是漏刻之名乃
謂周禮漏下三商爲昏商音滴梁元帝纂要日在未曰

映本左傳昭五年杜注乃以映爲映而引王仲宣詩山
岡有餘映證之于此見著述之不易也

歇後語

宋吳升優古堂詩話謂友于見南史劉湛友于素篤北
史李謐事兄盡友于之誠又陶淵明詩一欣侍溫顏再
喜見友于按友于二字後漢書已有之吳彌傳陛下隆
於友于又晉書馮紵傳陛下友于之情甚篤色斯亦始
於後漢書左雄傳或色斯以求名赫斯始於後漢書曹
節傳發赫斯之怒貽厥始於晉書賈充傳贊蓋歇後語

之濫觴也

前漢丞相謚

前漢丞相四十五人二十人無謚平當平晏父子爲相皆不得謚至於王商之剛直而謚曰戾張禹之奢淫而謚曰節亦拂乎是非之正矣

疊字

李易安聲聲慢詞尋尋覓覓冷冷清清悽悽慘慘戚戚連疊七字昔人稱其造句新警其源蓋出於爾雅釋訓篇篇中自明明至秩秩疊字凡一百四十四般悻悻

一段連疊十字此千古創格亦絕世奇文也

忍字

張公藝書忍字卽不癡不聾不爲家翁之意似與家人嚴威之旨有殊不知骨肉之間以分相維亦以情相接故於大防宜謹不得以玩肆致吝而於小節宜寬不可以操切生嫌其義未嘗相悖也

楊守謙客

洪武初教官給由至京帝詢民疾苦守嵐吳從權山陰張桓皆言臣職在訓士民事無所與帝怒曰宋胡瑗爲

蘇湖教授其教兼經義治事漢賈誼董仲舒皆起田里
敷陳時務唐馬周不得親見太宗且教武臣言事今旣
集朝堂朕親詢問俱無以對志聖賢道者固如是乎命
竄之邊方吳張之對蓋爲陳平有主之者一言所誤按
嘉靖時俺荅入寇保定巡撫楊守謙率師入援薄俺荅
營而陣無後繼不敢戰客有勸之戰者應曰周亞夫何
人乎客曰公悞矣今日何得比漢法守謙不納竟以失
誤軍機棄市客之識勝吳張二人遠矣

五聖丹

癩狗毒蛇咬人者多死方書雖有治法不甚著效惟蕭山韓氏所傳五聖丹獲效如神救人不可勝數韓氏惟製藥施送秘不傳人鄭拙言司鐸開化從其同寅汪睦齋學博世鈐處得此方見示汪喜錄單方製良藥施人此方得之於其至戚乃自韓氏竊得者汪按方製藥以拯人無不應手取效因錄之以廣其傳

上號當門子 一錢
梅花冰片 一錢
火硝 三分
上號腰

面雄黃 一錢
九製爐甘石 一錢

石藥共研細末男左女右用竹挖耳點近鼻處大眼角

七次隔一日再點七次再隔一日又點七次雖重傷者
自愈若犬齧至二十日外者不治若用藥後誤喫羊肉
用藥再治遲至二十日外者亦不治宜忌羊肉發物四
十九日兼治痧症悶死時疫傷寒痲發不出者亦用此
藥點眼角男左女右

方公祠

名宦建專祠子孫亦得祠祀永世勿替者天台方公祠
其最著矣公諱印號樸菴安徽桐城人明宏治間以孝
廉知天台縣薄賦省刑勸農桑治學校抑豪奸一切以

真誠出之爲縣九月卒囊中僅餘俸銀八錢僚佐吏民
爲助棺殮小民罷市相弔尋入祀名宦祠萬厯間元孫
大鎮巡按浙江建祠置田百餘畝屬學宮收租後漸爲
官役侵漁祠宇蕪圯道光十二年十一世孫傅穗觀察
浙東偵知其故乃盡以其田屬邑令使擇紳士之賢者
司其事歲登出入之數於官纖悉必書申之大府著爲
定律方氏子孫閱數歲必至祠省視以桐城縣印文爲
憑祠中給資斧錢
六十由是堂宇崇煥厯久常新祠中從祀者爲公之元
孫大鎮浙江九世孫觀承浙江撫觀本秀水知縣十世孫受疇

閩浙總督維甸浙江巡撫十一世孫傳甯紹台道蓋皆官於浙者

吳祭酒尺牘

錢塘吳穀人祭酒錫麒官京師時耽情騷雅不屑奔走
權門以故品望日高而生計日薄嘗貽友人書云弟藏
身人海終日閉門亦謂軟紅不到而釜中魚長甌裏塵
生幾欲服卻粒丹行食氣法修到太虛真人地位又云
自唱還雲之曲本擬有田可種藉奉晨昏無如饑來驅
我遂復入春明之夢兩年羈絆一步不移大抵生平好
作冷人天故以冷待之破帳紙窗索索然若時有西風

吹到不自知砭肌消骨也讀之可想見清寒風味

會試總裁五人

國朝會試總裁惟順治丁亥己丑二科皆七人其後或四人或三人二人而已道光己丑科曹文正公奉

命典試以老病辭

上不允時總裁已四人矣特增一人於是歛吳大司農
椿以光祿寺卿典試蓋異數也

學政三年六人

太湖李學士國杞道光己丑館選癸巳大考馬拔計交

趾論誤書趾作趾列四等罰俸二年戊戌大考心共寒
潭一片澄詩次聯云雙清觀我相一片勵臣心

御筆加圈列一等第一名由編修擢侍講學士己亥督
學浙江關防告示有年少登第學識淺陋之語未幾御
史蕭山高枚叅其寬縱 召至都未及啟程卽以療疾
卒年僅三十餘督學三年一更任而自丁酉至庚子共
易六人前此所未有也丁酉冬華陽卓侍郎秉恬來升
總憲去戊戌春桐城姚侍郎元之來升總憲去己亥春
侯官廖侍郎鴻荃來升總憲去是夏李繼之庚子春江

陰季正詹芝昌來是秋以丁憂去南海羅學士文俊來
在浙三年最得士心

題句鑄竹

餘姚吳蓉峯麟書官仁和訓導署有竹林小池種花滿
園終日諷詠其中不問俗事因題句鑄竹自述其樂趣
云廣文冷官不理詞訟教授生徒鎮日閑空有客入門
便衣迎送散步竹林隨口吟諷飲酒微醉華胥一夢睡
起醒來抱孫自弄快活逍遙卓異勿用可笑神仙苦修

山洞

三世能詩

唐人三世能詩者錢起子微孫可復可及珣柳公綽子仲郢孫璞璧珪玘章八元子孝標孫褐盧氏則綸以下四世才藻尤盛

本朝三世能詩秀水朱竹垞太史彝尊子昆田孫稻孫爲最著

用民興利

宋种世衡築青澗城初無水穿井百五十尺至石乃曰能屑石一畚者酬百錢居數日及泉民甚賴之王明爲

鄢陵令故事有所獻饋明日令不用錢可人致數束新
芻水際令欲得之得數十萬明取以築堤由是民無水
患明李中巡撫山東歲歉令民捕蝗者倍予穀蝗絕而
饑者濟陳幼學爲確山知縣荒地多茂草根深難墾令
民投牒者必入草十斤未幾草盡得沃田數百頃悉以
畀民此皆得用民興利之道者唐代宗將幸華清宮先
命完葺柳子華爲修宮使設棘圍曰民有得華清宮瓦
石材用投圍中踰三日不還者死不終日已山積矣此
則脅之以威乃權宜之術矣

漢書造語絕異

前後漢書造語有絕異者如刑法志云不祥莫大矣焉
燕刺王旦傳云其者寡人之不及與東平憲王蒼傳云
豈况築郭邑建都郭哉豈况二字屢見不及備引趙壹傳云三王亦
又不同樂宦者傳論云社稷故其爲墟此等句法後世
罕或用之

千里駒

千里駒之見於史者彙載諸說邵家而徐氏玉芝堂談
舊趙氏陔餘叢考所記較多漢劉德魏曹休晉傅咸劉

曜苻朗宋張敷梁蕭暎王茂任昉袁昂劉杳邱仲孚王

規北魏李伯尙李孝伯袁躍北齊馮翊王潤崔昂元文

遙北周杜果隋張虔威唐李昂李千里宋趙子洎遼耶

律的瑒共二十五人余爲補四人曰李景年十六國春秋前趙錄

朱友倫舊五代史趙彥舊五代史張汝霖金史魯連子有徐劫之

二號千里駒此皆不見於史而陔餘叢考亦引之又宋

仁宗稱劉永年爲劉氏千里駒見宣和畫譜晁

有明一代至文

馮恩子行可請代父死疏楊繼盛妻張氏請代夫死書

皆有明一代至文也雖暴戾之主閤之當爲釋怒乃行
可賴通政使陳經入奏恩得減死戍邊張氏書爲嚴嵩
所遏而繼盛遂死權奸之禍烈矣

黃鶴樓聯

湖北黃鶴樓聯甚多錄其最著者一上高樓緬當年江
漢風流多少千秋人物雙持使節喜此日荆衡形勢縱
橫萬里金湯

史貽直

我去太匆匆騎鶴仙人還送客茲游

殊戀戀落梅時節且登樓

錢楷

恨我到遲鶴已去怪人來

早詩先傳何時黃鶴重來且自把金尊看洲渚千年

芳草今日白雲尙在問誰吹玉笛落江城五月梅花
一樓萃三楚精神雲鶴皆空殘笛在二水縈百川支派
古今無盡大江流 欄杆外滾滾波濤任千古英雄挽
不住大江東去窗戶間堂堂日月儘四時憑眺幾曾見
黃鶴西來

西村集

明史明古鑑西村集弔內閣陳某詩云何事先生早蓋
棺雄歌聲裏路人歎填門客散恩何在負郭田多死亦
安鹽海已無前日利冰山誰障舊時寒九原若見南陽

李爲道羅生已復官按明史陳文傳言羅倫論李賢奪情文內媿陰助賢益爲時論所鄙又言既叅大政無所建明朝退則引賓客故人置酒爲曲宴專務請屬遇睚眦怨必報名節大喪此詩蓋道其實也

傳神寫照

傳神寫照見於晉書顧愷之傳後世謂之行看子亦稱行樂圖至今日而此風盛行幾於人各爲圖競出新意命名求人題詠甚至有空紙一幅名曰戶解圖以乞詩者真愈出愈奇矣

張少宗伯

鎮洋汪少司空廷嶼以第三人及第初名璿補博士弟

子員學使桐城張少宗伯廷璐

張以第二人及第

奇其文曰他

日名位不在吾下爲易其名且加廷字欲引爲昆弟行
也有相士之特識兼有愛士之虛衷江南人至今稱之

博古通今

袁隨園宰江甯城中韓姓女爲風吹至銅井村離城九
十里村氓次日送女還家女已嫁東城李秀才子李疑
風無吹人九十里之理必有姦約控官退婚袁曉之曰

古有風吹女子至六千里者汝知之乎李不信取元郝
文忠公陵川集示之曰郝公一代忠臣豈肯作詭語者
第當年風吹吳門女竟嫁宰相恐汝子無福耳李讀詩
大喜兩家婚配如初是知聽訟者當博古也汪龍莊大
令官湖南時宜章縣寡婦鄭宋氏無子欲繼親姪鄭觀
族人謂觀無兄弟且父死不宜後他人宋愬縣及州越
四年愬本道發汪闕訊汪曰觀宜嗣宋無疑孀婦立繼
聽其自擇昭穆相當獨子勿禁傳曰已孤不爲人後謂
不受命於所生父也今剛得出繼

天子命之矣又何訊焉因止宜章不傳兩造援例詳結
是知聽訟者當通今也

三圈手

東陽樓牧臣茂才梯霞少負雋才年十八病盲猶健於
女與友朋門藝以指圈桌可立就時人號曰三圈手學
使周春坊清原至金華執卷求試曰某盲艱於書不艱
於作乞得書敏者二人七藝當立成如其言果然又命
作詩衝口如應響遂補博士弟子員事屬破格人皆稱
樓之才而尤頌學使之賢云

臨文不諱

昔人爲祖與父作墓表家傳皆直書祖父之名不假他人填諱當是臨文不諱之義近代名人如全謝山太史集中先公墓石蓋文姚姬傳比部集中姚氏長嶺阡表皆然明都穆南濠詩話亦書父諱蓋不欲泥避諱之說致親名不彰耳

續名醫類案

錢塘魏玉橫之甥續名醫類案六十卷世無刊本余從文淵閣借四庫本錄一部凡六十六萬八千餘言採

取繁富閒有辨論亦皆精當王橫白述醫案數十其治

病尤長於脇痛

肝胃脘痛

肝木上乘

疝瘕等證謂醫家治此

每用香燥藥耗竭肝陰往往初服小效久則致死乃自

創一方名一貫煎統治脇痛吞酸吐酸疝瘕及一切肝

病惟因痰飲者不宜方用沙參麥冬地黃歸身枸杞子

川棟子六味出入加減投之應如桴鼓口苦燥者加酒

連尤捷余仿其法治此數證獲效甚神特表其功用以

告世之誤用香燥藥者